

Lynne Neagle AS

Ysgrifennydd y Cabinet dros Addysg

Vikki Howells AS

Y Gweinidog Addysg Bellach ac Uwch

23 Gorffennaf 2025

Cyllideb Ddrafft Llywodraeth Cymru ar gyfer 2026-27

Annwyl Lynne a Vikki,

Fel mewn blynyddoedd blaenorol, hoffem gael gwybodaeth ysgrifenedig i gefnogi ein gwaith craffu ar Gyllideb Ddrafft Llywodraeth Cymru 2026-27. Mae'r atodiad i'r llythyr hwn yn nodi'n fanwl y wybodaeth yr hoffem ei chael.

Byddwn yn ddiolchgar o gael y wybodaeth ysgrifenedig o leiaf bythefnos cyn i chi ymddangos gerbron y Pwyllgor, a bydd y dyddiad ar gyfer hynny yn cael ei drefnu maes o law.

O ystyried y diddordeb a rennir ar draws pwyllgorau ynghylch rhai o'r meysydd a restrir yn yr atodiad i'r llythyr hwn, rwyf wedi anfon copi at Gadeiryddion Pwyllgor yr Economi, Masnach a Materion Gwledig a'r Pwyllgor Diwylliant, Cyfathrebu, y Gymraeg, Chwaraeon, a Chysylltiadau Rhyngwladol.

Yn gywir,



Buffy Williams AS

Cadeirydd

Croesewir gohebiaeth yn Gymraeg neu Saesneg.

We welcome correspondence in Welsh or English.



Atodiad A: Cais i Ysgrifennydd y Cabinet dros Addysg, a'r Gweinidog Addysg Bellach ac Uwch ynghylch craffu ar Gyllideb Ddrafft y Pwyllgor Plant, Pobl Ifanc ac Addysg 2026-27

Meysydd trawsbynciol

Tryloywder y cyflwyniad o'r gyllideb

Fel gyda'r blynyddoedd blaenorol, gofynnwn am esboniad clir a thryloyw o'r newidiadau i'r Prif Grŵp Gwariant Addysg yn gyffredinol yn 2026-27, o 2025-26, gan gynnwys cymhariaeth â'r wir gyllideb yn ychwanegol at unrhyw waelodlin ddiwygiedig a ddefnyddir. Byddem hefyd yn gwerthfawrogi crynodeb o'r newidiadau allweddol rhwng 2025-26 a 2026-27.

Os defnyddir gwaelodlin ddiwygiedig, rydym yn gofyn am ddadansoddiad o'r symiau sydd wedi'u tynnu o gyllideb 2025-26 neu eu hychwanegu at gyllideb 2025-26 ac esboniad ym mhob achos pam y bernir ei bod yn briodol defnyddio'r waelodlin ddiwygiedig yn hytrach na'r wir gyllideb a osodwyd yn 2025-26 ar gyfer cymariaethau.

Ar gyfer newidiadau sylweddol i linellau cyllideb, hoffem gael eglurhad p'un a fydd cyllid yn cael ei ddychwelyd i/ei gymryd o gronfeydd wrth gefn canolog neu ei ddyrannu i/o linellau cyllideb eraill naill ai o fewn neu y tu allan i'r Prif Grŵp Gwariant.

Manylion dyraniadau Llinell Wariant yn y Gyllideb ac esboniad o'r newidiadau

Gofynnwn am ddadansoddiad o'r Prif Grŵp Gwariant Addysg ar gyfer 2026-27 yn ôl Cam Gweithredu a Llinell Wariant yn y Gyllideb, gyda dyraniadau Cyllideb Derfynol 2025-26, dyraniadau Cyllideb Atodol Gyntaf 2025-26, rhagolygon alldro 2025-26, ac alldro terfynol 2024-25 i gyd wedi'u cynnwys. Os yw cyllidebau dangosol yn cael eu gosod y tu hwnt i 2026-27, rydym yn gofyn am fanylion y rhai hynny hefyd. Yn y gorffennol, rydym wedi gofyn am sylwebaeth ar bob un o'r Camau Gweithredu o fewn y Prif Grŵp Gwariant Addysg. Cyn y llynedd, darparwyd hyn mewn atodiad. Rydym yn nodi na ddarparwyd sylwebaeth ar wahân y llynedd a darparwyd y wybodaeth ym mhrif gorff y papur, ynghyd â thabl cyllideb yn Atodiad A a rhestr o newidiadau yn Atodiad B. Canfuom fod y dull hwnnw'n foddhaol a byddem yn fodlon â'r un peth eleni. Fodd bynnag, os oes unrhyw Gamau Gweithredu nad ydynt wedi'u cwmpasu gan y materion y gofynnwyd amdanynt, byddem yn gwerthfawrogi esboniad o'r hyn y mae'r Camau Gweithredu hynny'n ei ariannu.

I gadarnhau, hoffem ddadansoddiad ac esboniad o newidiadau sylweddol i Gamau Gweithredu a Llinellau Gwariant yn y Gyllideb ers Cyllideb Atodol Gyntaf 2025-26 (Mehefin 2025).

Os yw Llywodraeth Cymru yn defnyddio cyllideb llinell sylfaen ddiwygiedig at ddibenion cymharol, rydym yn gofyn i ddyraniadau gwirioneddol Cyllideb Atodol Gyntaf 2025-26 gael eu cyflwyno ochr yn ochr â'r dyraniadau cyllideb ddrafft 2026-27 yn ogystal ag esboniad o'r rhesymau dros ail-gyfrifo'r llinell sylfaen (fel y nodwyd yn gynharach).

Blaenoriaethau addysg a blaenoriaethau strategol eraill

Gwybodaeth am sut mae'r Prif Grŵp Gwariant Addysg yn cyd-fynd â blaenoriaethau perthnasol ac amcanion allweddol Llywodraeth Cymru – ac yn cael ei flaenoriaethu yn ôl y rheini – gan gynnwys:

- Asesiad wedi'i ddiweddarau gan Ysgrifennydd y Cabinet dros Addysg ynghylch i ba raddau y mae'n credu bod y Prif Grŵp Gwariant Addysg yn cynnwys yr adnoddau sy'n angenrheidiol i gyflawni blaenoriaethau ac amcanion allweddol Llywodraeth Cymru.
- Gwybodaeth am unrhyw drafodaethau sy'n mynd rhagddynt gydag Ysgrifennydd y Cabinet dros Gyllid a'r Gymraeg i gynyddu lefel yr adnoddau sydd ar gael ar gyfer addysg, gan gynnwys cyllid ar gyfer cyllidebau craidd ysgolion drwy'r Setliad Llywodraeth Leol.
- Manylion ynghylch sut mae dyraniadau o fewn y Prif Grŵp Gwariant Addysg yn alinio â'r Rhaglen Lywodraethu.
- Yng ngoleuni cyhoeddiad Ysgrifennydd y Cabinet dros Gyllid a'r Gymraeg ar 1 Gorffennaf y bydd cyllideb 2026-27 ond yn cynyddu cyllidebau adrannol yn ôl chwyddiant, yn hytrach nag adlewyrchu polisïau a blaenoriaethau newydd, sut mae Ysgrifennydd y Cabinet dros Addysg wedi gallu ystyried materion sy'n dod i'r amlwg ac yn cynyddu ers gosod cyllideb 2025-26.
- A yw Ysgrifennydd y Cabinet yn bwriadu targedu adnoddau at fynd i'r afael ag unrhyw themâu neu flaenoriaethau trawsbynciol ar draws y Prif Grŵp Gwariant yn ei gyfanrwydd, ac os felly, sut.

Hawliau plant ac ystyriaethau trawsbynciol eraill

Yn unol ag asesu a roddwyd 'sylw dyledus' i erthygl 4 o Gonfensiwn y Cenhedloedd Unedig ar Hawliau'r Plentyn a dyletswyddau Llywodraeth Cymru o dan Fesur Hawliau Plant a Phobl Ifanc (Cymru), gofynnwn am:

- Asesiad o'r Effaith ar Hawliau Plant cyffredinol ar gyfer y Prif Grŵp Gwariant Addysg drafft hwn ar gyfer 2026-27 sy'n nodi sut mae hawliau plant yn cael eu gweithredu yn y dyraniadau cyllideb hyn, gan gyfeirio at erthyglau penodol yng Nghonfensiwn y Cenhedloedd Unedig ar Hawliau'r Plentyn fel sy'n berthnasol.
- Os na chynhaliwyd Asesiad penodol o'r Effaith ar Hawliau Plant, y rhesymau dros hyn.

- Copi o unrhyw asesiad arall o'r effaith integredig yn ogystal â sicrwydd bod yr asesiad hwn yn dangos bod y ddyletswydd o "roi sylw dyledus" i Gonfensiwn y Cenhedloedd Unedig ar Hawliau'r Plentyn wedi'i harfer.
- Manylion a/neu enghreifftiau o unrhyw newidiadau a wnaed i ddyraniadau cychwynnol o fewn y MEG Addysg yn dilyn ystyriaethau o hawliau plant, cydraddoldeb, cynaliadwyedd, y Gymraeg, neu Ddeddf Llesiant Cenedlaethau'r Dyfodol (Cymru) 2015 o ganlyniad i asesiadau effaith, neu lle mae'r asesiadau hyn wedi cael dylanwad uniongyrchol ar bennu cyllidebau.

Costau deddfwriaeth

- Manylion y dyraniadau yng nghyllideb 2026-27 a fwriedir ar gyfer gweithredu deddfwriaeth sylfaenol a basiwyd yn ystod dau dymor diwethaf y Senedd, gan gynnwys Deddf y Gymraeg ac Addysg (Cymru) 2025, Deddf Addysg Drydyddol ac Ymchwil (Cymru) 2022, Deddf Cwricwlwm ac Asesu (Cymru) 2021, a Deddf Anghenion Dysgu Ychwanegol a'r Tribiwnlys Addysg (Cymru) 2018.
- Gwybodaeth am effaith ariannol unrhyw ddeddfwriaeth berthnasol gan Senedd y DU, er enghraifft y Bil Lles Plant ac Ysgolion.
- Goblygiadau ariannol unrhyw is-ddeddfwriaeth berthnasol yn 2026-27.

Effaith pandemig COVID-19

- Gwybodaeth am unrhyw ddarpariaeth sy'n weddill yn y Prif Grŵp Gwariant Addysg yn 2025-26 a 2026-27 ar gyfer delio ag effaith y pandemig ac adfer ohono, er enghraifft statws y cyllid "Recriwtio, Adfer, Codi Safonau" blaenorol a gafodd ei gyfuno â'r Grant Addysg Awdurdodau Lleol o 2024-25.

Effaith pwysau costau byw ar ddarparu gwasanaethau addysg

- Diweddariad ar oblygiadau pwysau costau byw a phrisiau ynni ar ddarparu sefydliadau addysg yn weithredol – ar draws y blynyddoedd cynnar, ysgolion, colegau, prifysgolion a darparwyr hyfforddiant.

Monitro'r gyllideb a'r cyd-destun ariannol presennol

- Gwybodaeth am y prosesau sydd ar waith ar gyfer monitro cyllidebau o fewn y Prif Grŵp Gwariant Addysg drwy gydol y flwyddyn, nodi diffygion a gwargedion posibl, a chymryd camau adferol neu ddyrannu arian ychwanegol i dalu am unrhyw ddiffygion.

- Manylion am unrhyw newidiadau i'r Prif Grŵp Gwariant Addysg ar gyfer 2025-26 y'u disgwylir eisoes yn yr Ail Gyllideb Atodol.

Meysydd penodol

Cyllid ar gyfer cyllidebau ysgolion

- Esboniad ynghylch a yw Llywodraeth Cymru wedi blaenoriaethu cyllid ar gyfer ysgolion yng Nghyllideb Ddrafft 2026-27 a sut y mae wedi gwneud hynny (yn y Prif Grŵp Gwariant Tai a Llywodraeth Leol a'r Prif Grŵp Gwariant Addysg).
- Sut mae'r adolygiad o'r fformiwla ariannu ysgolion (a gyhoeddwyd ym mis Chwefror 2025) a'r Rheoliadau Cyllido Ysgolion, Datganiadau Cyllideb a Datganiadau Alldro (Cymru) 2026 arfaethedig wedi cael eu hystyried yn null Llywodraeth Cymru o ddarparu cyllid a fwriadwyd ar gyfer ysgolion yn 2026-27.
- Safbwynt Ysgrifennydd y Cabinet ar lefel y cronfeydd wrth gefn yn y gyllideb ysgolion, yng nghyd-destun data 31 Mawrth 2025 sydd i'w cyhoeddi ddiwedd mis Hydref 2025.

Cyllid ar gyfer gwella ysgolion a chodi safonau

- Esboniad o sut mae Cyllideb Ddrafft 2026-27 yn cefnogi gwella ysgolion a chodi safonau addysg, a sut mae'n adlewyrchu newidiadau sy'n digwydd o dan y Rhaglen Bartneriaeth Gwella Ysgolion.
- Manylion Grant Addysg Awdurdodau Lleol yn 2026-27, gan gynnwys dadansoddiad o'i bedair elfen.
- Manylion faint o Grant Addysg Awdurdodau Lleol a dalwyd i bob awdurdod lleol yn 2025-26, gan gynnwys dadansoddiad yn ôl y bedair elfen.
- Asesiad wedi'i ddiweddarau a gynhaliwyd ar effaith cyfuno grantiau unigol â'r Grant Addysg Awdurdodau Lleol yn 2024-25 a sut mae Llywodraeth Cymru yn sicrhau ei hun na fu unrhyw wanhau ar unrhyw weithgareddau ac ymyriadau a oedd gynt wedi'u neilltuo.
- Gwybodaeth am ddyraniadau cyllideb i gefnogi ymdrechion i wella safonau llythrennedd a rhifedd ac unrhyw asesiad sydd wedi'i wneud o'u heffeithiolrwydd a gwerth am arian.
- Cyllid ar gyfer rhaglen cymorth grant y Cwricwlwm i Gymru a manylion nifer a gwerth y grantiau a ddyfarnwyd.
- Unrhyw gyllid arall i gefnogi'r gwaith o weithredu'r Cwricwlwm i Gymru.

- Gwybodaeth ar sut mae adnoddau o fewn y Prif Grŵp Gwariant Addysg yn cael eu defnyddio i leihau ymrwymiad hirdymor Llywodraeth Cymru i fynd i'r afael ag effaith amddifadedd ar ganlyniadau addysgol - gan gynnwys o'r Llinell Wariant yn y Gyllideb "Mynd i'r Afael â Rhwystrau i Gyrhaeddiad" neu o'r Grant Addysg Awdurdodau Lleol.
- Gwybodaeth am y ddarpariaeth yn y gyllideb ar gyfer y Grant Hanfodion Ysgolion a'r gwariant yn 2025-26, gan gynnwys nifer y disgyblion a gefnogir, ac a ragwelir yn 2026-27.
- Gwybodaeth am sut mae adnoddau o fewn y Prif Grŵp Gwariant Addysg yn cael eu defnyddio i gefnogi dysgwyr mewn addysg ôl-16 gydag effaith pwysau costau byw, ac i fynd i'r afael ag effaith amddifadedd ar ganlyniadau (gan gynnwys, er enghraifft, drwy gyllid cronfa caledi ar gyfer darparwyr, neu drwy gyllid cymorth i fyfyrwyr sy'n bodoli eisoes fel y Lwfans Cynhaliaeth Addysg).
- Unrhyw ddarpariaeth yn y gyllideb sy'n weddill ar gyfer cyflwyno prydau ysgol am ddim i bawb mewn ysgolion cynradd yn 2025-26 ac a oes angen unrhyw gyllideb ar gyfer hyn yn 2025-26,. A oes unrhyw ystyriaeth bellach wedi'i roi i ymestyn cymhwysedd mewn ysgolion uwchradd, yn enwedig o ystyried y penderfyniad yn Lloegr i ymestyn prydau ysgol am ddim i bob disgybl mewn cartrefi sy'n derbyn credyd cynhwysol. Os na, sut mae Llywodraeth Cymru yn bwriadu defnyddio unrhyw swm canlyniadol Barnett sy'n deillio yn sgil y penderfyniad yn Lloegr.
- Dadansoddiad o unrhyw gyllid grant a ddarparwyd i awdurdodau lleol yn 2025-26 ar gyfer darparu prydau ysgol am ddim yn gyffredinol mewn ysgolion cynradd.
- Unrhyw gyllid arall yn y Prif Grŵp Gwariant Addysg ar gyfer mentrau i fynd i'r afael â chostau byw a'r gydberthynas negyddol rhwng amddifadedd a chyrhaeddiad, er enghraifft rhaglen gwella gwyliau'r haf / haf o hwyl / prosiectau bwyd a hwyl, gan gynnwys esboniad wedi'i ddiweddarau o sut mae'r prosiectau hyn a'r ffrydiau ariannu yn perthyn i'w gilydd.

Y Gweithlu Addysg

- Manylion y dyraniadau'r gyllideb i ariannu Addysg Gychwynnol Athrawon (AGA), gan gynnwys cyllid a mentrau sydd wedi'u targedu at fynd i'r afael â phrinder mewn pynciau neu feysydd penodol, ac unrhyw asesiad sydd wedi'i wneud o'u heffeithiolrwydd a'u gwerth am arian.
- Manylion dyraniadau'r gyllideb i gefnogi dysgu proffesiynol ar gyfer athrawon presennol, gan gynnwys yn sgil y gwaith parhaus o weithredu diwygiadau addysg.

- Gwybodaeth am gyllid a ddarperir gan Lywodraeth Cymru i Gyngor y Gweithlu Addysg.
- Gwybodaeth am gyllid i sefydlu ac ariannu'r corff dysgu proffesiynol ac arweinyddiaeth cenedlaethol newydd. Sut mae hyn yn cymharu â'r cyllid ar gyfer yr Academi Genedlaethol Arweinyddiaeth Addysgol ac a yw cyllid ar gyfer y corff newydd yn disodli hyn yn uniongyrchol.
- Manylion am unrhyw ddarpariaeth cyllideb ar gyfer talu costau dyfarniad cyflog i athrawon ar gyfer blwyddyn academaidd 2025/26, gan gynnwys dadansoddiad rhwng y blynyddoedd ariannol 2025-26 a 2026-27 a'r mecanweithiau priodol a ddefnyddiwyd (p'un a ydynt yn grant uniongyrchol neu wedi'u hymgorffori yn y setliad llywodraeth leol).
- Gwybodaeth am unrhyw gyllid i gefnogi polisi ynghylch y gweithlu athrawon cyflenwi.

Iechyd emosiynol ac iechyd meddwl plant a phobl ifanc

- Darpariaeth y gyllideb o'r Prif Grŵp Gwariant Addysg yn 2026-27 o ran y dull/system ysgol gyfan o ymdrin ag iechyd emosiynol a meddyliol.
- Manylion unrhyw arian o'r Prif Grŵp Gwariant Iechyd a Gofal Cymdeithasol i ategu gwaith mewn ysgolion yn y maes hwn.
- Gwybodaeth am unrhyw ddarpariaeth gyllidebol i gefnogi iechyd meddyliol ac emosiynol pobl ifanc mewn addysg ôl-16.
- Darpariaeth yn y gyllideb ar gyfer y cynllun gweithredu a'r ymateb ehangach i fynd i'r afael ag aflonyddu rhywiol rhwng cyfoedion ymhlith dysgwyr.

Ymddygiad a thrais

- Darpariaeth y gyllideb o'r Prif Grŵp Gwariant Addysg ar gyfer mynd i'r afael â phroblemau sy'n deillio o ymddygiad a thrais mewn ysgolion a cholegau (gan gynnwys, er enghraifft, camau gweithredu yn deillio o'r cyfarfod bord gron ar drais a diogelwch a'r uwchgynhadledd genedlaethol ar ymddygiad – y ddau wedi'u cynnal ym mis Mai).

Absenoldeb disgyblion

- Gwybodaeth am unrhyw ddarpariaeth gyllidebol benodol i fynd i'r afael â chyfraddau absenoldeb disgyblion neu nodi pa linellau cyllideb sy'n cefnogi gwaith o'r fath yn fwy cyffredinol (gan gynnwys, er enghraifft, Swyddogion Ymgysylltu â Theuluoedd ac Ysgolion Bro).

- Gwybodaeth am sut mae'r Prif Grŵp Gwariant Addysg yn cefnogi'r ddarpariaeth chwaraeon a gweithgarwch corfforol i blant a phobl ifanc, boed hynny yn yr ysgol neu y tu allan i'r ysgol, a sut mae hyn yn ymwneud ag unrhyw fentrau neu gyllid yn y Prif Grŵp Gwariant Iechyd a Gofal Cymdeithasol megis ar gyfer Pwysau Iach, Cymru Iach.
- Sut mae cyllid cyfalaf drwy'r rhaglen Cymunedau Dysgu Cynaliadwy yn cefnogi chwaraeon a gweithgarwch corfforol ymhlith plant a phobl ifanc.

Cefnogaeth ar gyfer dysgwyr o leiafrifoedd ethnig a dysgwyr o gymunedau Sipsiwn, Roma a Theithwyr

- Manylion cyllid i gefnogi addysg dysgwyr o leiafrifoedd ethnig a dysgwyr o gymunedau Sipsiwn, Roma a Theithwyr yn 2026-27 a sut mae hyn yn cael ei ddosbarthu fel rhan o'r Grant Addysg Awdurdodau Lleol.

Anghenion Dysgu Ychwanegol (ADY)

- Crynodeb wedi'i ddiweddarau o sefyllfa'r cyllid ar gyfer cefnogi dysgwyr gyda'u ADY, o'r Llinell Gwariant yn y Gyllideb ar gyfer Anghenion Dysgu Ychwanegol a llinyn Diwygio Addysg y Grant Addysg i Awdurdodau Lleol.
- Goblygiadau'r adolygiad a gynhaliwyd a'r hyn y mae hyn wedi'i ddangos am y lefelau gofynnol o gyllid ADY.
- Asesiad wedi'i ddiweddarau o ran a yw'r diwygiadau ADY yn profi i fod yn niwtral o ran cost.
- Gwybodaeth am sut mae cyllid ar gyfer darpariaeth ADY yn cael ei gynnwys yn yr adolygiad o'r fformiwla ariannu ysgolion a sut mae'n cael ei ystyried fel rhan o'r Rheoliadau Cyllido Ysgolion, Datganiadau Cyllideb a Datganiadau Alldro (Cymru) 2026 arfaethedig.
- Y sefyllfa ddiweddaraf ar gyllid ar gyfer hyfforddi seicolegwyr addysg yng Nghymru ac unrhyw drefniant cyllid grant gyda sefydliadau addysg uwch, er enghraifft, Prifysgol Caerdydd.

Estyn

- Manylion dyraniad cyllideb craidd Estyn ar gyfer 2026-27 a pha Brif Grŵp Gwariant/Llinell Wariant yn y Gyllideb y mae hwn wedi'i leoli ynddo.

- Canlyniad y gwaith a wnaed gydag Estyn i reoli effaith peidio â gallu darparu unrhyw gyllid ychwanegol yr adeg hon y llynedd (ac eithrio codiadau chwyddiant) i gefnogi'r cylch arolygu newydd (a grybwyllwyd ym mhapur y llynedd).

Cymwysterau

- Manylion y cyllid a ddyrannwyd i Gymwysterau Cymru yn 2026-27 ac asesiad wedi'i ddiweddarau ynghylch a oes ganddo ddigon o gyllid i gyflawni ei gylch gwaith ac unrhyw waith diwygio a ddisgwylir ganddo.

Y Gymraeg mewn Addysg

- Manylion dyraniadau yn y Prif Grŵp Gwariant Addysg i gefnogi polisiau Llywodraeth Cymru ar gyfer y Gymraeg mewn addysg, a rôl y sector addysg o ran cyrraedd targed Cymraeg 2050 o filiwn o siaradwyr Cymraeg.
- Sut mae dyraniadau yn y Prif Grŵp Gwariant Addysg yn berthnasol i gyllidebau eraill sy'n cefnogi'r Gymraeg, er enghraifft Cam Gweithredu y Gymraeg yn y Prif Grŵp Gwariant Gwasanaethau Canolog a Gweinyddu.
- Ble mae cyllid ar gyfer gweithredu Deddf y Gymraeg ac Addysg (Cymru) 2025 wedi'i leoli yng nghyllideb Llywodraeth Cymru a faint sy'n cael ei ddyrannu.
- Gwybodaeth am gyllid a ddyrannwyd i wella'r gweithlu Cymraeg mewn addysg.

Rhaglen Seren

- Manylion y ddarpariaeth gyllidebol i gefnogi rhaglen Seren a'r Prosiect Ehangu Cyfranogiad.

Addysg blynyddoedd cynnar a gofal plant

- A yw'r cyllid yn y Grant Addysg Awdurdodau Lleol i gefnogi alinio cyfraddau cyllido mewn addysg feithrin mewn lleoliadau nas cynhelir, a gofal plant o fewn y Cynnig Gofal Plant, yn parhau yn 2026-27. Naratif ar unrhyw effaith ar nodau i 'alinio' cyfraddau ar y penderfyniad o fis Ebrill 2025 i gynyddu'r gyfradd fesul awr ar gyfer darparwyr gofal plant o ddarparu'r Cynnig Gofal Plant o £5.00 i £6.40 yr awr o'r Prif Grŵp Gwariant lechyd a Gofal Cymdeithasol (ac ymrwymiad Llywodraeth Cymru i adolygu'r gyfradd hon yn flynyddol o hyn ymlaen.)
- Manylion unrhyw gyllid arall o'r Prif Grŵp Gwariant Addysg i gefnogi darpariaeth addysg plentyndod cynnar / feithrin y sector nas cynhelir a'r Cwricwlwm i Gymru, a sut mae hyn yn

gysylltiedig â'r cyllid ar gyfer cyfrifoldebau'r Gweinidog Plant a Gofal Cymdeithasol mewn perthynas â'r blynyddoedd cynnar a gofal plant.

Gwaith ieuenctid

- Manylion ynghylch sut mae'r Prif Grŵp Gwariant Addysg ar gyfer 2026-27 yn cefnogi gwasanaethau ieuenctid statudol a gwirfoddol a'r ddarpariaeth yn y gyllideb ar gyfer bodloni ymrwymadau'r Rhaglen Lywodraethu o ran cryfhau gwasanaethau ieuenctid.
- Sut mae'r Gyllideb Ddrafft hon ar gyfer 2026-27 yn adlewyrchu canfyddiadau a gwaith yr Adolygiad o gyllido gwaith ieuenctid.
- Manylion ynghylch sut mae'r Prif Grŵp Gwariant Addysg ar gyfer 2026-27 yn cefnogi Strategaeth Gwaith Ieuenctid Cymru, gwaith y Bwrdd Gweithredu a gwaith i sefydlu corff cenedlaethol ar gyfer gwaith ieuenctid yng Nghymru fel y nodir yn y Datganiad Ysgrifenedig: Corff cenedlaethol a fframwaith statudol ar gyfer gwaith ieuenctid (27 Mehefin 2025).

Dysgu ar gyfer Troseddwy

- Gwybodaeth am ddarpariaeth y gyllideb yn 2026-27 ac unrhyw newidiadau i sut y caiff ei wario o gymharu â blynyddoedd blaenorol.

Cyllid ar gyfer Medr

- Cyfanswm y cyllid ar gyfer Medr yn 2026-27 a disgwyliadau Llywodraeth Cymru ynghylch sut y bydd Medr yn dyrannu hyn (pwyntiau mwy manwl wedi'u rhestru isod)

Addysg bellach, chweched dosbarth ac addysg i oedolion yn y gymuned

- Faint o gyfanswm dyraniad Medr yn 2026-27 y bwriedir iddo gael ei ddefnyddio ar gyfer dosbarthiadau chweched dosbarth a cholegau addysg bellach, ac unrhyw ddefnydd penodol o'r cyllid hwn.
- Manylion cyllid 2025-26 a ddyrannwyd i Medr ar gyfer dosbarthiadau chweched dosbarth unigol (neu awdurdodau lleol) a cholegau, a beth yw diben y cyllid hwn.
- Manylion unrhyw gyllid wedi'i neilltuo i sefydliadau addysg bellach neu chweched dosbarth y tu hwnt i'w grantiau craidd arferol.
- Y dyraniad ar gyfer Dysgu Oedolion a'r Gymuned.
- Y rhestr lawn o werthoedd rhaglenni ar gyfer 2024-25 a 2025-26 a ddefnyddir wrth gyfrifo'r cyllid ar gyfer Addysg Bellach a'r Chweched Dosbarth.

- Manylion ar sut mae cynnydd mewn cymorth ariannol wedi effeithio ar y gyllideb ddrafft (yn benodol y cynnydd yng Ngrant Dysgu (AB) Llywodraeth Cymru a'r trothwyon uwch ar gyfer cymhwysedd ar gyfer LCA)

Addysg uwch, a chymorth ariannol ar gyfer myfyrwyr ôl-16

- Faint o gyfanswm dyraniad Medr yn 2026-27 y bwriedir iddo gael ei ddefnyddio ar gyfer addysg uwch, ac unrhyw ddefnydd penodol o'r cyllid hwn.
- Manylion ynghylch sut mae'r gyllideb ddrafft yn cefnogi ac yn adlewyrchu sefyllfaoedd ariannol sefydliadau addysg uwch Cymru
- Manylion ar sut mae cynnydd mewn cymorth i fyfyrwyr israddedig rhan-amser a llawn amser cymwys yng Nghymru, yn ogystal â chymorth ar gyfer astudiaethau meistr ôl-raddedig ac astudiaethau doethuriaeth ôl-raddedig, wedi dylanwadu ar y gyllideb ddrafft.
- Manylion ynghylch a yw penderfyniadau i godi'r uchafswm ffioedd dysgu ar gyfer astudiaethau israddedig wedi dylanwadu ar ddyraniadau i Medr
- Manylion dyraniad Medr, gan gynnwys manylion unrhyw gyllid wedi'i neilltuo, neu gyllid a fwriedir ar gyfer gweithgareddau penodol gan gynnwys iechyd meddwl a llesiant myfyrwyr.
- Manylion unrhyw ddyraniad ar gyfer 2026-27 a fwriadwyd ar gyfer cyflwyno prentisiaethau gradd, ac a fwriedir ei ddefnyddio i recriwtio prentisiaid newydd neu i ddysgu prentisiaid presennol.
- Manylion unrhyw gyllid cyfalaf sydd i fod ar gael ar gyfer Medr, gan gynnwys unrhyw amodau i'w gosod arno gan Lywodraeth Cymru.
- Manylion am unrhyw gronfeydd wrth gefn / cynlluniau wrth gefn / cronfeydd heb eu dyrannu o fewn unrhyw un o'r llinellau gwariant yn ymwneud ag addysg drydyddol 2026-27, gan gynnwys y llinellau gwariant o fewn y cam gweithredu Cymorth i Ddysgwyr ôl-16; manylion sut mae'r arian yn cael ei ddefnyddio / sut gellir ei ddefnyddio; a manylion am unrhyw ddefnydd ohonynt yn ystod 2025-26.

Darpariaeth addysg ôl-16 arall

- Gwybodaeth am ddisgwyliadau Llywodraeth Cymru ynghylch sut y bydd Medr yn defnyddio cyfanswm ei ddyraniad i ariannu darpariaeth addysg ôl-16 arall.
- Manylion cyllid ar gyfer y Rhaglen Cyfnewid Dysgu Rhyngwladol (Taith) gan gynnwys ei hestyniad i fis Mawrth 2028.

- Manylion am ddarpariaeth y gyllideb ar gyfer y Coleg Cymraeg Cenedlaethol, naill ai o'r Prif Grŵp Gwariant Addysg neu'r Llinell Wariant yn y Gyllideb y Gymraeg o'r Prif Grŵp Gwariant Gwasanaethau Canolog a Gweinyddu.

Y Warrant i Bobl Ifanc

- Manylion am ddarpariaeth y gyllideb o'r Prif Grŵp Gwariant Addysg sy'n cyfrannu at y Warrant i Bobl Ifanc a sut mae'n ymwneud â chyllid o Brif Grŵp Gwariant yr Economi, Ynni a Chynllunio.

Cyllid cyfalaf ar gyfer seilwaith ysgolion a cholegau

- Gwybodaeth am ddarpariaeth y gyllideb ar gyfer y rhaglen Cymunedau Dysgu Cynaliadwy a chynnydd y rhaglen hyd yma, gan gynnwys gwariant a nifer y prosiectau a gwblhawyd/a gymeradwywyd hyd yn hyn o dan Fand B.
- Amcanestyniad o pryd y mae'n debygol y bydd Band B wedi'i gwblhau a diweddariad ar gam nesaf y rhaglen sy'n cynnwys cynlluniau buddsoddi 9 mlynedd awdurdodau lleol.
- Asesiad wedi'i ddiweddarau o oblygiadau costau byw, er enghraifft prisiau ynni ac adeiladu, ar gyfer y rhaglen Cymunedau Dysgu Cynaliadwy, gan gynnwys unrhyw effaith ar gynnydd a chostau prosiectau.
- Y goblygiadau ariannol o bolisiâu sero net carbon Llywodraeth Cymru a sut mae hyn yn effeithio ar y Prif Grŵp Gwariant Addysg yn 2026-27.
- Darpariaeth yn y Prif Grŵp Gwariant Addysg – ac eglurhad ynghylch a yw'n gyfalaf neu'n refeniw – ar gyfer atgyweirio a chynnal a chadw ysgolion a cholegau, yn 2025-26 a 2026-27, a chadarnhad ynghylch a yw hyn yn rhan o'r rhaglen Cymunedau Dysgu Cynaliadwy.

Cyllid cyfalaf at ddibenion gofal plant

- Cadarnhad o statws y Rhaglen Gyfalaf Gofal Plant a'r Blynnyddoedd Cynnar a oedd i fod i ddod i ben yn wreiddiol yng Ngwanwyn 2025 ond a gafodd gyllid pellach yn 2025-26, ac a oes unrhyw ddryaniadau i ymestyn hyn i 2026-27.
- Gwybodaeth am gyllid cyfalaf o'r Prif Grŵp Gwariant Addysg ar gyfer y rhaglen Cynnig Gofal Plant a Dechrau'n Deg ac unrhyw ddryaniadau at ddibenion yr ymrwymiad i gyflwyno gofal plant Dechrau'n Deg i bob plentyn 2 oed.

Cyllid cyfalaf ar gyfer y fenter Ysgolion sy'n Canolbwyntio ar y Gymuned

- Gwybodaeth am drefniadau ar gyfer cyllid sydd â'r nod o gynyddu natur ystadau addysg sy'n canolbwyntio ar y gymuned ac addasu safleoedd i gael eu defnyddio gan y gymuned.

